

APITETANAINTSIRI IROSANKINARE JUAN

Ovethataantsi

¹Antarikona jinatzí itzimi osankinatzi-
rori iroka. Eeroka nosankinatzi ipaiyeetziri
“Iyoshiitaaro tsinane ipoña otomiite.”
Netakoperotane pinayetatzí. Tera apaniro
naaka netakotami, añá jetakotzitaami eejatzí
maaroni iyotayetairone kyaaryoori.* ²Ari
okantari, oisokero ovayetairo kyaaryoori, ari
ankantaitaayeeni. ³Onkamintha ineshinon-
kayetaimi Ashitairi Pava, inkaminthaaye-
taimi, kameetha pisaikayetai. Ari inkempi-
taimiri eejatzí Itomi Jesucristo, piyoyetairo
kyaaryoori petakotavakaantayetaiyaari.

Oisokero povero jiyotaimiri Cristo

⁴Osheki nokimoshiretanake noñaayetake
tsika pikaratzi eerokaite pimatapiintanakero
kyaaryoori, pimatajaantanakero ikantakaan-
takeri Ashitairi. ⁵Eerora nosankinatzi
iroñaaka ovakerari ikantakaantaitane, añá
iro nonkinkishiretakaimi okaratzi nokaman-
tayetakemiri ovakera pikempisantantana-
kari. Jiroka okanta: Ontzimatyé etakotava-
kaiya. ⁶Aririka antapiintanairo ikantakaan-
tane Ashitairi, aritake amatanairo etakotava-
kaapiintaiya. Iroora nokantakaantakemiri
pantapiintayetairo okaratzi pantayetanakeri
ovakera pikempisantantanakari. ⁷Tema

tzimayetatsi iroñaaka osheki amatavitaneri.
Ikantayetzi irikaite, “te iratziritajaantapainte
Jesucristo.” Tema thairi inatzí itzimirika
ñaavaitzirori iroka, iisaneentane inatzí
Cristo. ⁸Paamaventya, povashaantzirokari
okaratzi niyotaaetakemiri. Te nonkove
pamenaashivaitaiya, eero piñeero panintaa-
vaitaiya apaata. ⁹Itzimirika kenakaashpero-
vaitachane, kaari oisokerotyaarone jiyotaan-
tapaintziri Cristo, tera itsipashiretari Pava.
Iriima tsika itzimi oisokerotakarori jiyotaan-
tapaintziri Cristo, iriitake matakero itsipashi-
retari Ashitairi, ari ikempitzitakari eejatzí
Itomi. ¹⁰Intzimerika impaitya kivantemiri
janta, impoña inkove iriyotaimiro
nashitachari kinkitharentsi, eero pishinetziri
irisakavankotemi. Eero aritaajatzí povetha-
tyaari eejatzí. ¹¹Tema aririka povethatyaari,
kempivaitaka pakakotatyeerimi iyaaripe-
ronka okaratzi jantziri irirori.

Nokovake noñeeyemini

¹²Tzimatsi osheki nosankinatemiri, iro
kantacha tera intaani nonkove nosanki-
natemiro, añá nokovatzí niyaatashitemi
noñeemi, inkene nonkinkithavaitakaimi,
inkene ankimoshiretaiyeeni.

¹³Jovethataiyami ipaiyeetziri “otomiite
pitsiro iyoshiitaro.” Ari onkantaari.*

* 1: Tzimatsi pampithashiretakotarori ipaiyeetziri “Iyoshiitaaro tsinane ipoña otomiite,” iriira oshiyakaaventachari jaka ikaratzi kempisantzinkariite itzimi apatotaachari aparoni nampitsiki. Okantavetaka te ayotero tsika otzimi nampitsi japatoyetantaari irikaite kempisantzinkariite.

* 13: Tzimatsi pampithashiretakotarori ipaiyeetziri “otomiite pitsiro iyoshiitaro,” iriyetake oshiyakaaventachari kempisantzinkariite itzimi apatoyetaachari janta tsika inampitaro Juan osankinatzirori iroka.